



**МЭДЭЭЛЛИЙН ТЕХНОЛОГИ, ШУУДАН,
ХАРИЛЦАА ХОЛБООНЫ ГАЗРЫН ДАРГЫН
ТУШААЛ**

2015 оны 03 сарын 25 өдөр

Дугаар 71

Улаанбаатар хот

Бодлогын чиглэл батлах тухай

Монгол Улсын Засгийн газрын агентлагийн эрх зүйн байдлын тухай хуулийн 8 дугаар зүйлийн 8.4 дэх хэсэг, Харилцаа холбооны тухай хуулийн 6 дугаар зүйлийн 6.1.2 дахь заалт, Цахим гарын үсгийн тухай хуулийн 33 дугаар зүйлийн 33.1.1 дахь заалт, тус газрын Даргын зөвлөлийн 2015 оны 03 дугаар сарын 13-ны өдрийн 04 дүгээр хурлын шийдвэрийг тус тус үндэслэн ТУШААХ нь:


Нэг. Монгол Улсад Цахим гарын үсгийн тухай хуулийг хэрэгжүүлэх ажлын хүрээнд “Нийтийн түлхүүрийн дэд бүтцийг ашиглах талаар төрөөс баримтлах бодлогын чиглэл”-ийг хавсралтаар баталсугай.

Хоёр. Дээрх бодлогын чиглэлийн хэрэгжилтийг хангуулан, хяналт тавьж ажиллахыг тус газрын Харилцаа холбоо, шуудангийн хөгжлийн хэлтсийн дарга /Г.Чинзориг/-т даалгасугай.

ДАРГА



Ц. ЖАДАМБАА



МОНГОЛ УЛСАД ЦАХИМ ГАРЫН ҮСГИЙН ТАЛААР ТӨРӨӨС БАРИМТЛАХ БОДЛОГЫН ЧИГЛЭЛ

Нэг. Ерөнхий зүйл

1.1 Энэхүү баримт бичиг нь Монгол Улсад цахим гарын үсгийн хэрэглээг нэвтрүүлэхэд баримтлах чиглэлийг тодорхойлно.

Хоёр. Нэр томьёоны тодорхойлолт


2.1 Уг баримт бичигт дурдсан нэр томьёог Цахим гарын үсгийн тухай хуульд заасан утгаар хэрэглэнэ

2.2 Энэхүү бодлогын чиглэлд дурдсан нэр томьёог дор дурдсан утгаар ойлгоно.

2.2.1 “Монгол Улсын үндэсний суурь гэрчилгээжүүлэх байгууллага /цаашид “МУУСГБ”/ гэх” гэж Өөрийгөө баталгаажуулах эрх бүхий Монгол Улсын үндэсний гэрчилгээжүүлэх байгууллагыг;

Гурав. Нийтийн түлхүүрийн дэд бүтцийн тогтолцоо

3.1 Монгол Улс нь нийтийн түлхүүрийн шаталсан тогтолцоог мөрдөх ба дараах ерөнхий бүтэцтэй байна:



3.2 Нийтийн түлхүүрийн дэд бүтцийн МУҮСГБ нь төрийн эзэмшилд байх ба цахим орчинд <https://www.esign.gov.mn> хаягаар үйл ажиллагаа явуулна.

3.3 МУҮСГБ-ын үйл ажиллагаа, аюулгүй байдлыг Үндэсний Дата Төв УТҮГ хариуцна.

3.4 МУҮСГБ болон гэрчилгээ олгох үйл ажиллагаа эрхлэх тусгай зөвшөөрөл хүсэгч этгээд нь нийтийн түлхүүрийн дэд бүтцийг ашиглахтай холбогдсон нийтлэг дүрэм, журмуудад үндэслэн өөрийн гэрчилгээжүүлэх бодлого ба гэрчилгээжүүлэх үйл ажиллагааны журмыг боловсруулж, батална.

3.5 МУҮСГБ нь Харилцаа холбооны асуудал эрхэлсэн төрийн захиргааны байгууллагаас олгосон гэрчилгээ олгох үйл ажиллагаа эрхлэх тусгай зөвшөөрөл эзэмшигчийн тоон гарын үсгийн гэрчилгээг олгоно.

3.6 Бүртгэлийн нэгжийн үүргийг бусад этгээдээр гүйцэтгүүлэх тохиолдолд зөвхөн аж ахуйн нэгжээр гүйцэтгүүлнэ.

3.7 Гадаад улсын нийтийн түлхүүрийн дэд бүтцийн үйл ажиллагаатай үндэсний нийтийн түлхүүрийн дэд бүтцийн үйл ажиллагааг нийцүүлэх чиглэлээр гадаад улс, олон улсын байгууллагатай хамтран ажиллах үүргийг МУҮСГБ гүйцэтгэнэ.

3.8 Төр өөрийн үйл ажиллагаанд зориулан гэрчилгээжүүлэх байгууллага байгуулж болох ба уг гэрчилгээжүүлэх байгууллага нь Үндэсний Дата Төв УТҮГ-ын дэргэд байна.

Дөрөв. Нийтийн түлхүүрийн дэд бүтцийн стандарт

4.1 Монгол Улсын нийтийн түлхүүрийн дэд бүтцийн тогтолцоонд Монгол Улсын болон олон улсын дараах стандартуудыг мөрдлөг болгоно. Үүнд:

4.1.1 Тоон гарын үсгийн гэрчилгээ нь Олон улсын цахилгаан холбооны байгууллага (ITU)-ын ITU-T X.509 стандартын хувилбар 3ыг хангах;

4.1.2 Гэрчилгээжүүлэх бодлого ба гэрчилгээжүүлэх үйл ажиллагааны журам нь Интернэтийн инженерчлэлийн мэргэшсэн багийн IETF RFC 3647 стандартыг хангах;

4.1.3 Аюулгүй байдлыг хангах арга хэмжээ нь “Мэдээллийн аюулгүй байдлын удирдлагын үйл ажиллагааны дүрэм” /MNS/ISO 17799:2007/,

Мэдээллийн аюулгүй удирдлагын тогтолцоо, шаардлага /MNS/ISO 27001:2007/ -г хангах;

4.1.4 Дараах технологийн стандарт болон зөвлөмжийг ханган ажиллах; Үүнд:

a. PKCS #1- #15 стандартууд;

b. RFC3280 - Интернэтийн орчны X.509 нийтийн түлхүүрийн гэрчилгээ, хүчингүй гэрчилгээний жагсаалтын тайлбар (*RFC3280 - Internet X.509 Public Key Infrastructure Certificate and Certificate Revocation List (CRL) Profile*);

Тав. Тусгай зөвшөөрөл олгох

5.1 Гэрчилгээ олгох үйл ажиллагаа эрхлэх тусгай зөвшөөрлийг үндэслэлтэй, ил тод ба үл ялгаварлах зарчмаар олгоно.

5.2 Гэрчилгээ олгох үйл ажиллагаа эрхлэх тусгай зөвшөөрөл эзэмшигчийн тоог хязгаарлахгүй.

5.3 Гэрчилгээ олгох үйлчилгээний хөлс нь өртөгт суурилна.

5.4 Төрийн байгууллагын хэрэгцээнд зориулан ашиглах тоон гарын үсгийн гэрчилгээ олгох үйл ажиллагаа эрхлэх тусгай зөвшөөрлийг төрийн байгууллагад олгож болох ба тусгай зөвшөөрөл нь дараах шаардлагыг хангасан байна. .
Үүнд:

5.4.1 Тухайн үйл ажиллагаа нь төрийн бодлого, зорилтыг хангахад чиглэсэн байх;

5.4.2 Тусгай зөвшөөрөл олгохтой холбоотой нийтлэг журам, нөхцөл шаардлагуудыг бүрэн хангасан байх;

5.4.3 Зөвхөн төрийн албаны ажил, үүргийг гүйцэтгэхэд шаардлагатай тоон гарын үсгийн гэрчилгээг олгох үйл ажиллагаа эрхлэх;

5.4.4 Гэрчилгээний үнэ, тарифыг зөвхөн урсгал зардлаа санхүүжүүлэх хэмжээнд тогтоох

**Зургаа. Гэрчилгээ олгох үйл ажиллагаа эрхлэгчид
тавих ерөнхий шаардлага**

6.1 Гэрчилгээ олгох үйл ажиллагаа эрхлэгч нь Цахим гарын үсгийн тухай хуулийн 29 дүгээр зүйлийн 29.2 дах хэсэгт заасан үүргийг биелүүлэх мэдлэг, чадвар, туршлага бүхий мэргэжлийн боловсон хүчинтэй байх; Үүнд:

6.1.1 Цахим гарын үсгийн технологи болон түүний аюулгүй байдлыг хангах техникийн болон удирдлагын чадвартай;

6.1.2 Холбогдох стандартуудыг удирдлагын болон дотоод үйл ажиллагаанд нэвтрүүлэх чадвартай;

6.1.3 Цахим гарын үсгийн шинэ техник, технологийг зах зээлд нэвтрүүлэх чадвартай;

6.2 Хууль, журамд заасан эрх, үүргийг хэрэгжүүлэх санхүүгийн эх үүсвэртэй байх;

6.3 Олгосон гэрчилгээний хугацаа дуусах эсвэл цуцалснаас хойш 10 жилийн хугацаанд хадгална.

Долоо. Бодлогын чиглэл хүчин төгөлдөр болох

7.1 Энэ бодлогын чиглэлийг 2015 оны 03 дугаар сарын 13-ны өдрөөс эхлэн дагаж мөрдөнө.

---ooOoo---